

Daphne Lejuez:

"A purba di silencio y intimidacion mi cu e fin di sostene y proteha e coalicion actual"



ORANJESTAD(AAN): Diaranzon Parlamentario Daphne Lejuez a yama un conferencia di prensa atardi, pa anuncia cu el a dicidi di bira Parlamentario Independiente. El a lesa un comunicado cu el a skirbi, den cual cu el a bisa entre otro cu el a cuminsa su carera den politica cu e proposito di salvaguardia nos constitucion, nos hendenan y bienestar di Aruba como candidato riba lista di MEP y despues como Parlamentario di Aruba. "Semper mi a 'stand up for what is right' (para pa locual ta husto y corecto) y ta mi intencion pa sigui haci esaki semper pa mi mes, pa mi famia y pa mi pais". "Na 2017 mi a huramenta dilanti Gobernador pa semper hasi mi trabou a base di principianan di honor, cu un consenshi limpi y sin presion of influencia externo (incluyendo di partido, coalicion of di poderman economico), pasobra e interes general di henter Aruba mester keda sirbi". Esaki segun Lejuez, kende a indica cu como legislador ta su deber y obligacion pa amplia su conocimiento, particularmente conocimiento huridico. "Pa e motibo aki mi a scoge pa tuma e reto pa banda di mi trabou como

Parlamentario cuminsa atende facultad di ley na Universidad di Aruba". "Recientemente den tratamiento di ley di Serlimar, mi persona, conhuntamente cu conseho huridico di instancianan manera Raad van Advies y di otro expercionan tanto huridico como constitucional, a detecta inconsistencianan den e estructura legal di e ley unda cu esaki lo por hiba na consecucionan cu lo por mina e derechonan di e ciudadano, unda cu segun interpretacion di e ley, lo otorga un compania estatal e poder di cobra pa un 'afvalstoffeffing', es decir, belasting pa desperdicio, sin fundamento legal of declaracion di destinacion conciso con e fondonan aki lo wordo utiliza". "Adicionalmente e ley tambe lo otorga e minister en cuestion e autoridad absoluto pa cambia e tarifa di e afvalstoffeffing aki sin intervencion di gobierno of Parlamento". "E falta di transparencia aki ta un punto di preocupacion grave, cual mester keda adresa, y na unda a purba di silencio y intimidacion mi cu e fin di sostene y proteha e coalicion actual". "A sabienas cu e formulacion di e concepto di ley aki tambe lo mina e derechonan di e ciudadano pa por haci bezwaar/

entrega reclamo ora di tin un obheccion na un posibel cobranza". Esaki segun e ex parlamentario di MEP, kende a sigui bisa cu esaki lo no ta husto pa e ciudadano. "Mientras e ley ta existi

un aumento di entrada pa maneho di Serlimar, te dia di awe no a logra di substancia esaki door di produci un Business Plan, ni tampoco un plan operacional of di contingencia den caso di incidentenan

ambiental. Mucho menos, un plan financiero cu ta defini e pakico di un aumento di tarifa y introduccion di un afvalstoffeffing (impuesto), sin presenta un especificacion di e gastonan adicional".

Lidernan ta bisa cu gobernacion ta sigui

ORANJESTAD (AAN): E decision di Parlamentario Daphne Lejuez declara su mes como Parlamentario Independiente, a pone algun hende kere cu Gobierno lo cay.

Esey no ta berdad. Pasobra aunke coalicion tin menos hende den Parlamento awor, toch nan tin e mayoria.

Den oranan di atardi, e lidernan di Partidonan MEP, POR, y RED a firma un carta pa muestra cu nada no a cambia, y gobernacion ta sigui. E carta ta muestra cu Daphne Lejuez



a entrega su retiro como parlamentario di MEP.

Esaki ta algo cu partido MEP lo atende internamente prome. Pa Gobierno nada ta cambia. E acuerdo di Coalicion entre partidonan MEP-POR-RED ta sigui manera acorda den e programa di gobernacion "Hunto Pa Aruba" y lo sigui atende cu e retonan real di nos pais, pa asina brinda Aruba e estabilidad politico cu nos mester na e momento aki.

E carta ta firma pa Evelyn Wever-Croes, Otmar Oduber, y Ricardo Croes.